



## Terenga 2: Hōtaka 37 – kei...ana

Huakina mai te tatau o te whare o te reo. Tomo mai kia pāinaina ai tātou i te takuahi o Ako e ngiha nei, e whitawhita nei. Takahia mai te iho nui i takahia rā e rātou ka noho hei tapuwae i te rongo maraeroa o Tahu. Nau mai, tauti mai.

### Hei Mahi Whakarongo

Ka rongo koutou ki ngā kōrero a tētehi hunga e ngākaunui ana ki te whutupōro nō roto mai i te ao Māori me ā rātou tohutohu ki te kaitohutohu matua o te Kapa o pango. Anei ngā pātai hei whakautu mā koutou:

1. He aha te tono a Julian ki a Kereama mā e pā ana ki a Piri Weepu?
2. He aha te tikanga o te kōrero 'mahia kei tamariki ana'?
3. He ōrite te kupu 'whakatonu' ki tēwhea kupu?

### He Whakamārama

**Mahia kei tamariki ana.**

He rite tēnei kōrero ki ēnei rerenga e whai ake nei:

**Mahia i a koe e tamariki ana.**

**Mahia i te wā e tamariki ana.**

Ko te mahi kei te tīmatanga o te rerenga. Ka mutu he tohutohu ēnei tauira nā te mea he hāngū te kupu tuatahi. Ko te wā me mahi i taua mahi e noho ana i waenganui i te 'kei' me te 'ana'. Anei te whakapākehātanga o ēnei tauira: *'Do it while you're young.'*

### Hei Manatu

Ko te kōrero hei manatu mā tātou i te rā nei ko te pātai e mōhio ai koe ki te wā.

Mai rā anō kua rere te pātai: **He aha te wā?**

Kei te tika rānei tēnei whakatakotoranga i runga i tā te Māori titiro ki tēnei mea, ki te rere o te wā?

Ko ētehi e kī ana, kāore i te hāngai ki tā te Māori titiro. Kei te whai kē i te whakatakotoranga o te reo Pākehā. *'What is the time?'* Anei ētehi anō pātai e whakamahia ana kia hāngai ake ki tā te Māori titiro.

**Kei te pēhea te wā?**

**Kei te aha te wā?**

Tēnā wānangahia te rerenga e whakamahia ana e koe me te hāngai o taua whakatakotoranga ki tā te Māori titiro ki te rere o te wā.

### Hei Mahi

**Panonihiā ēnei rerenga kia hāngai ki te whakatakotoranga tuatahi o runga ake nei:**

1. Kōrerohia i a koe e tū ana.
2. I te wā e tū ana koe, māu te karakia.
3. Whāia ō wawata i a koe e takakau ana.
4. I a kōrua e noho ana ki konā, whakawetohia ngā waea pūkoro.

### Whakautu:

1. Kōrerohia kei tū ana koe.
2. Kei tū ana koe, māu te karakia.
3. Whāia ō wawata kei takakau ana koe.
4. Kei noho ana kōrua ki konā, whakawetohia ngā waea pūkoro.